



Ovaj projekat finansira Evropska unija



LOKALNA PARTNERSTVA  
ZA ZAPOSŁJAVANJE  
U BOSNI I HERCEGOVINI



International Labour Organization

PREDMET: Saopćenje za medije

### U okviru EU projekta otvoren poslovni inkubator „BeeZone“ u Travniku

U okviru projekta „TRIK za nove mogućnosti u zapošljavanju i poduzetništvu“ u srijedu 04. aprila 2018. godine u prostorijama Centra za edukaciju mladih – CEM u Travniku, otvoren je poslovni inkubator „BeeZone“. Poslovni inkubator će u narednom periodu pomagati mladim poduzetnicima u razvijanju poslovnih ideja nudeći pozitivno poduzetničko okruženje, ali i stručnu, mentorsku i finansijsku pomoć. Osim navedenoga, inkubator nudi i veliki broj svakodnevnih kurseva za stanare i vanjske klijente. Treneri su lokalno i međunarodno priznati certificirani stručnjaci. Kursevi koji se nude su iz oblasti poslovnih vještina, informacijskih tehnologija, desktop aplikacija i administracije.

Na samom početku prisutnima se obratila Aida Daul, sekretar Općine Travnik, koja je istakla da je Općina Travnik, kao jedan od partnera u projektu, raspoložena za svaki vid saradnje koja može doprinijeti novim radnim mjestima u Travniku. Prisutne je pozdravila i Meliha Gekić Lerić, direktorica poslovnog inkubatora INTERA Tehnološkog parka u Mostaru koja je prisutne upoznala sa radom tehnološkog parka do sada ukazujući na veliki broj uspješnih, poduzetničkih priča koje su nastale unutar istog. Kao uspješna priča INTERA tehnološkog parka u Mostaru, prisutnima se obratio nekadašnji start-up Hasib Alić, direktor kompanije Alviral d.o.o., govoreći o svojim iskustvima u poslovnom inkubatoru, ali i važnosti jednog ovakvog inkubatora za mlade ljude koji imaju inovativne ideje.

Partneri u projektu su istakli da je u toku javni poziv za podršku poslovnim idejama kroz poslovni inkubator, koji, između ostalog, podrazumijeva i podršku do 10 000 KM po aplikantu za inovativne ideje koje imaju potencijal rasta i stvaranja novih radnih mjesta, te da svi zainteresovani javni poziv u cjelosti, kao i aplikacijski obrazac mogu pronaći na [www.rez.ba](http://www.rez.ba) ili na [www.cem.ba](http://www.cem.ba).

Nakon svečanog otvorenja poslovnog inkubatora „BeeZone“ za mlade buduće poduzetnike održana je radionica o radu inkubatora, koju je vodila Meliha Gekić Lerić.

Osnovni cilj projekta „TRIK za nove mogućnosti u zapošljavanju i poduzetništvu“ je stvaranje povoljnog okruženja za nova radna mjesta promocijom poduzetništva i provođenjem poduzetničkih obuka. Realizacijom ovog projekta bi se ostvario dugoročni održivi efekat procesa kreiranja institucionalne i sistemske podrške zapošljavanju mladih u općini Travnik kroz stvaranje stimulativnog poslovnog okruženja, a koje će aktivno doprinositi povećanju novootvorenih poslovnih subjekata/radnih mjesta, ali i kontinuiranoj promociji poduzetništva i poduzetničkog obrasca ponašanja među nezaposlenim mladim ljudima kao ugroženoj populaciji.

Vodeći partner u projektu je Regionalna razvojna agencija za regiju Centralna BiH - REZ, a partneri su: Općina Travnik, Centar za edukaciju mladih – CEM, Sveučilište/Univerzitet "Vitez" u Travniku, Služba za zapošljavanje SBK/KSB, GS tmt d.o.o. Travnik i NOBIL d.o.o. Nova Bila, a isti se se implementira u okviru krovnog projekta „Podrška lokalnim partnerstvima za zapošljavanje u Bosni i Hercegovini“, kojeg financira EU, a provodi Međunarodna organizacija rada (ILO).